

# 全唐詩/卷704



以2024年10月1日从维基文库导出

黃滔

[姊妹计划: 数据项](#)[版本](#)

## 黃滔

[黃滔](#)，字文江，莆田人。昭宗乾寧二年擢進士第。光化中，除四門博士，尋遷監察御史，裏行充威武軍節度推官。[王審知](#)據有全閩，而終其身為節將者，滔規正有力焉。集十五卷，今編詩三卷。

### 送僧歸北巖寺

北巖泉石清，本自高僧住。  
新松五十年，藤蘿成古樹。

題詩昔佳士，  
(滔表丈從叔有名於當時，兼四門薛博士俱曾題

詩。) 清風二林喻。

上智失扣關，多被浮名誤。  
蓮扃壓月澗，空美黃金布。  
江翻島嶼沈，木落樓臺露。  
伊餘東還際，每起煙霞慕。  
旋為儉府招，未得窮野步。  
西軒白雲閣，師辭洞庭寓。  
越城今送歸，心到焚香處。

## 寓言

流年五十前，朝朝倚少年。  
流年五十後，日日侵皓首。  
非通非介人，誰論四十九。  
賢哉蘧伯玉，清風獨不朽。

## 長安書事

終不離青山，誰道雲無心。  
卻是白雲士，有時出中林。  
昨日擎紫泥，明日要黃金。  
炎夏群木死，北海驚波深。  
伏蒲無一言，草疏賀德音。

## 賈客

大舟有深利，滄海無淺波。  
利深波也深，君意竟如何。  
鯨鯢齒上路，何如少經過。

## 寄友人

君愛桃李花，桃李花易飄。  
妾憐松柏色，松柏色難凋。  
當年識君初，指期非一朝。  
今辰見君意，日暮何蕭條。  
入門有勢利，孰能無囂囂。

## 落花

落花辭高樹，最是愁人處。  
一一旋成泥，日暮有風雨。  
不如沙上蓬，根斷隨長風。  
飄然與道俱，無情任西東。

## 寄徐正字夔

八月月如冰，登樓見姑射。  
美人隔千里，相思無羽駕。  
紅蘭裊露衰，誰以流光訝。  
何當詩一句，同吟祝玄化。

## 秋夕貧居

聽歌桂席闌，下馬槐煙裏。  
豪門腐梁肉，窮巷思糠粃。  
孤燈照獨吟，半壁秋花死。  
遲明亦如晦，雞唱徒為爾。

## 書懷寄友人

此生如孤燈，素心挑易盡。  
不及如頑石，非與磨礱近。  
常思揚子雲，五藏曾離身。  
寂寞一生中，千載空清芬。

## 閨怨

妾家五嶺南，君戍三城北。  
雁來雖有書，衡陽越不得。  
別久情易料，豈在窺翰墨。  
塞上無煙花，寧思妾顏色。

## 喜翁文堯員外病起

衛玠羊車懸，長卿駟馬姿。  
天嫌太端正，神乃減風儀。  
飲冰俾消渴，斷穀皆清羸。  
越僧誇艾炷，秦女隔花枝。

自能論苦器，（語見《泗州和尚碑》）不假求良

醫。

驚殺漳濱鬼，錯與劉生隨。

昨日已另虎，今朝謁荀池。

揚鞭入王門，四面人熙熙。  
青桂任霜霰，尺璧無瑕疵。  
回塵卻惆悵，歸闕難遲遲。

## 寄鄭縣李侍御

古縣新煙火，東西入客詩。  
靜長如假日，貧更甚閒時。

僧借松蘿住，人將雨雪期。  
三年一官罷，嶽石看成碑。

## 上李補闕

十洲非暫別，龍尾肯慵登。  
諫草封山藥，朝衣施衲僧。  
月留江客待，句歷釣船徵。  
終恐林棲去，餐霞葉上升。

## 送李山人往湘中

漢渚往湘川，乘流入遠天。  
新秋無岸水，明月有琴船。  
露坐應通曉，萍居恐來年。  
嶽峰千萬仞，知上嘯猿巔。

## 書崔少府居 一作贈李補闕

魯史蜀琴旁，陶然舉一觴。  
夕陽明島嶼，秋水淺池塘。  
世亂憐官替，家貧值歲荒。  
前峰亦曾宿，知有辟寒方。

## 敷水盧校書

九霄無詔下，何事近清塵。  
宅帶松蘿僻，日唯猿鳥親。

吟高僊掌月，期有洞庭人。  
莫問煙霞句，懸知見嶽神。

## 寄漢上友人

襄漢多清景，東遊已不能。  
蒹葭照流水，風雨撲孤燈。  
獻賦聞新雁，思山見去僧。  
知君北來日，惆悵亦難勝。

## 貽林鐸

終被春闈屈，低回至白頭。  
寄家僧許嶽，釣浦雨移洲。  
戰士曾憐善，豪門不信愁。  
王孫草還綠，何處擬羈遊。

## 書懷

退耕逢歉歲，逐貢愧行朝。  
道在愁雖淺，吟勞鬢欲凋。  
破村虹入井，孤館客投魍。  
誰怕秋風起，聽蟬度渭橋。

## 送陳明府歸衡陽

鷓鴣兼留下，單車出柳煙。  
三年兩殊考，一日數離筵。

久別湖波綠，相思嶽月圓。  
翠蘿曾隱處，定恐卻求仙。

## 秋辭江南

灞陵橋上路，難負一年期。  
積雨鴻來夜，重江客去時。  
勞生多故疾，漸老少新知。  
惆悵都堂內，無門雪滯遺。

## 入關旅次言懷

寸心唯自切，上國與誰期。  
月晦時風雨，秋深日別離。  
便休終未肯，已苦不能疑。  
獨媿商山路，千年四皓祠。

## 貽李山人

野步愛江濱，江僧得見頻。  
新文無古集，往事有清塵。  
松竹寒時雨，池塘勝處春。  
定應雲雨內，陶謝是前身。

## 寄邊上從事

斜日下孤城，長吟出點兵。  
羽書和客卷，邊思雜詩情。



朔雪定鴻翼，西風嚴角聲。  
吟餘多獨坐，沙月對樓生。

## 題東林寺元佑上人院

廬阜東林寺，良遊未曾。  
半生隨計吏，一日對禪僧。  
泉遠攜茶看，峰高結伴登。  
迷津出門是，子細問三乘。

## 送陳樵下第東歸

青山烹茗石，滄海寄家船。  
雖得重吟歷，終難任意眠。  
砧疏連寺柳，風爽徹城泉。  
送目紅蕉外，來期已杳然。

## 寄陳礪隱居

道經前輩許，名拔後時喧。  
虛左中興榜，無先北海尊。  
新文漢氏史，別墅謝公村。  
須到三徵處，堂堂謁帝闈。

## 寄林寬

相知四十年，故國與長安。  
俱喜今辰在，休論往歲難。

海鳴秋日黑，山直夏風寒。  
終始前儒道，升沈盡一般。

## 退居

老歸江上村，孤寂欲何言。  
世亂時人物，家貧後子孫。  
青山寒帶雨，古木夜啼猿。  
惆悵西川舉，戎裝度劍門。

## 送友人邊遊

銜杯國門外，分手見殘陽。  
何日還南越，今朝往北荒。  
砂城經雨壞，虜騎入秋狂。  
親詠關山月，歸吟鬢的霜。

## 下第出京

還失禮官求，花時出雍州。  
一生為遠客，幾處未曾遊。  
故疾江南雨，單衣薊北秋。  
茫茫數年事，今日淚俱流。

## 游東林寺

平生愛山水，下馬虎溪時。  
已到終嫌晚，重遊預作期。

寺寒三伏雨，松偃數朝枝。  
翻譯如曾見，白蓮開舊池。

## 贈懷光上人

謝城還擁入，師以接人勞。  
過午休齋慣，離經吐論高。  
頂寒拳素髮，珠銳走紅條。  
終憶泉山寺，聽猿看海濤。

## 憶廬山舊游

前年入廬嶽，數宿在靈溪。  
殘燭松堂掩，孤峰月狔啼。  
平生為客老，勝境失雲棲。  
縱有重游日，煙霞會恐迷。

## 別友人

莫恨東牆下，頻傷命不通。  
苦心如有感，他日自推公。  
雨夜扁舟發，花時別酒空。  
越山煙翠在，終愧臥雲翁。

## 陳侍御新居

幕客開新第，詞人遍有詩。  
山憐九仙近，石買太湖奇。

樹勢想高日，地形誇得時。  
自然成避俗，休與白雲期。

## 寄從兄璞

縱徵終不起，相與避煙塵。  
待到中興日，同看上國春。  
新詩說人盡，舊宅落花頻。  
移覓深山住，啼猿作四鄰。

## 寄李校書游簡寂觀

古觀雲溪上，孤懷永夜中。  
梧桐四更雨，山水一庭風。  
詩得如何句，仙游最勝宮。  
卻愁逢羽客，相與入煙空。

## 寄友人山居

斷嶠滄江上，相思恨阻尋。  
高齋秋不掩，幾夜月當吟。  
落石有泉滴，盈庭無樹陰。  
茫茫名利內，何以拂塵襟。

## 上刑部盧員外

誰識在官意，開門樹色間。  
尋幽頻宿寺，乞假擬歸山。

半白侵吟鬢，微紅見藥顏。  
不知琴月夜，幾客得同閒。

## 送友人游邊

虜酒不能濃，縱傾愁亦重。  
關河初落日，霜雪下窮冬。  
野燒枯蓬旋，沙風匹馬衝。  
薊門無易過，千里斷人蹤。

## 和友人酬寄

新發煙霞詠，高人得以傳。  
吟銷松際雨，冷咽石間泉。  
大國兵戈日，故鄉饑饉年。  
相逢江海上，寧免一潛然。

## 下第

昨夜孤燈下，闌干泣數行。  
辭家從早歲，落第在初場。  
青草湖田改，單車客路忙。  
何人立功業，新命到封王。

## 過商山

燕雁一來後，人人盡到關。  
如何沖臘雪，獨自過商山。

羸馬高坡下，哀猿絕壁間。  
此心無處說，鬢向少年斑。

## 旅懷

蕭颯聞風葉，驚時不自堪。  
宦名中夜切，人事長年諳。  
古畫僧留與，新知客遇談。  
鄉心隨去雁，一一到江南。

## 冬暮山舍喜標上人見訪

寂寞三冬杪，深居業盡拋。  
徑松開雪後，砌竹忽僧敲。  
茗汲冰銷溜，爐燒鵲去巢。  
共談慵僻意，微日下林梢。

## 關中言懷

三秦五嶺意，不得不依然。  
跡寓枯槐曲，業蕪芳草川。  
花當落第眼，雨暗出城天。  
層閣浮雲外，何人動管弦。

## 題友人山居

到君棲跡所，竹徑與衡門。  
亦在乾坤內，獨無塵俗喧。

新泉浮石蘚，崩壁露松根。  
更說尋僧處，孤峰上嘯猿。

## 寄敷水盧校書

諫省垂清論，仙曹豈久臨。  
雖專良史業，未畏直臣心。  
路入丹青近，家藏華嶽深。  
還如韓吏部，誰不望知音。

## 贈明州霍員外

惠化如施雨，鄰州亦可依。  
正衙無吏近，高會覺人稀。  
海日旗邊出，沙禽角外歸。  
四明多隱客，閑約到岩扉。

## 題友人山齋

疎竹漏斜暉，庭間陰復遺。  
句成苔石茗，吟弄雪窗棋。  
沙草泉經澀，林齋客集遲。  
西風虛見逼，未擬問京師。

## 書事

望歲心空切，耕夫盡把弓。  
千家數人在，一稅十年空。

沒陣風沙黑，燒城水陸紅。  
飛章奏西蜀，明詔與殊功。

## 題山居逸人

十畝餘蘆葦，新秋看雪霜。  
世人誰到此，塵念自應忘。  
斜日風收釣，深秋雨信梁。  
不知雙闕下，何以謂軒裳。

## 題鄭山人居

履跡遍莓苔，幽枝間藥栽。  
枯杉擎雪朵，破牖觸風開。  
泉自孤峰落，人從諸洞來。  
終期宿清夜，斟茗說天台。

## 秋晚山居

爽氣遍搜空，難堪倚望中。  
孤煙愁落日，高木病西風。  
山寂樵聲出，露涼蟬思窮。  
此時塵外事，幽默幾人同。

## 遊山

洞門穿瀑布，塵世豈能通。  
曾有遊山客，來逢採藥翁。



異花尋複失，幽徑躡還窮。  
擬作經宵計，風雷立滿空。

## 題王侍御宅內亭子

俗間塵外境，郭內宅中亭。  
或有人家創，還無蓮幕馨。  
石曾湖岸見，琴誤岳樓聽。  
來客頻頻說，終須作畫屏。

## 題道成上人院

花宮城郭內，師住亦清涼。  
何必天臺寺，幽禪瀑布房。  
簟舒湘竹滑，茗煮蜀芽香。  
更看道高處，君侯題翠梁。

## 貧居冬杪

數塞未求通，吾非學養蒙。  
窮居歲杪雨，孤坐夜深風。  
年長慚昭代，才微辱至公。  
還愁把春酒，雙淚汙杯中。

## 貽張嬪 一本題下有同年二字。

夢思非一日，攜手卻淒涼。  
詩見江南霽，遊經塞北霜。

驅車先五漏，把菊後重陽。  
惆悵天邊桂，誰教歲歲香。

## 晚春關中

忍歷通莊出，東風舞酒旗。  
百花無看處，三月到殘時。  
游塞聞兵起，還吳值歲饑。  
定唯荒寺裏，坐與噪蟬期。

## 河梁

五原人走馬，昨夜到京師。  
繡戶新夫婦，河梁生別離。  
隴花開不豔，羌笛靜猶悲。  
惆悵良哉輔，鏘鏘立鳳池。

## 送翁拾遺

還家俄赴闕，別思肯淒淒。  
山坐輶車看，詩持諫筆題。  
天開中國大，地設四維低。  
拜舞吾君後，青雲更有梯。

## 逢友人

彼此若飄蓬，二年何所從。  
帝都秋未入，江館夜相逢。

瘴嶺行冲夏，邊沙住隔冬。  
旅愁論未盡，古寺扣晨鐘。

## 寄湘中鄭明府

縣與白雲連，滄洲況縣前。  
嶽僧同夜坐，江月看秋圓。  
琴拂莎庭石，茶擔乳洞泉。  
莫耽雲水興，疲俗待君痊。

## 寄少常盧同年

官拜少常休，青綈換鹿裘。  
狂歌離樂府，醉夢到瀛洲。  
古器巖耕得，神方客謎留。  
清溪莫沈釣，王者或畋遊。

## 傷翁外甥

江頭去時路，歸客幾紛紛。  
獨在異鄉歿，若為慈母聞。  
青春成大夜，新雨壞孤墳。  
應作芝蘭出，泉臺月桂分。

## 東山之遊未遂漸逼行期作四十字奉寄翁文堯員外

輶車難久駐，須到別離時。  
北闕定歸去，東山空作期。

綠苔勞掃徑，丹鳳欲銜詞。  
楊柳開帆岸，今朝淚已垂。

[返回頁首](#)

[◀ 上一卷](#)

[下一卷 ▶](#)

[全唐詩](#)



本唐朝作品在全世界都属于公有领域，因为作者逝世已经远远超过100年。

# About this digital edition

This e-book comes from the online library [Wikisource](#)<sup>[1]</sup>. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)<sup>[2]</sup> license or, at your choice, those of the [GNU FDL](#)<sup>[3]</sup>.

Wikisource is constantly looking for new members. During the realization of this book, it's possible that we made some errors. You can report them at [this page](#)<sup>[4]</sup>.

The following users contributed to this book:

- S M Lee
- Kcx36
- PeepP~commons wiki
- Patrick
- Alvesgaspar
- Rocket000

- Jdx
- Nk
- DieBuche
- Crt
- Nickshanks
- Boris23
- KABALINI
- Bromskloss
- Tene~commonswiki
- AzaToth
- Bender235
- PatríciaR
- Dbenbenn

- 
1. [↑https://wikisource.org](https://wikisource.org)
  2. [↑https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
  3. [↑https://www.gnu.org/copyleft/fdl.html](https://www.gnu.org/copyleft/fdl.html)
  4. [↑https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)